


DAVID CORRAL DÍAZ



TROBO
terra e xente

Prólogo

Este libro que tes nas mans, *Trobo: terra e xente*, amigo lector, é a un tempo entrañable e modélico. Nel o autor, David Corral Díaz, vai enfiando as referencias entrañables da súa vida coa intrahistoria e os marcos referenciais da mesma, dunha parroquia galega, Santa María de Trobo, no concello de Begonte da Terra Chá luguesa. Esta é a referencia á terra e ás persoas coas que o autor se sente vencellado dende o máis fondo da súa vida e experiencias. Ao mesmo tempo é modélico dende o que significan estudos como o presente no ámbito da cultura e da antropoloxía cultural de Galicia. Con moitos estudos coma este cambiaría a faciana da nosa historia persoal e colectiva e poderíamos afrontar con máis rigor e lucidez o noso futuro. Non cabe dúbida de que este traballo, concienzudo e rigoroso onde os haxa, vén reivindicar a dignidade, a cultura e a forma de ser da xente da aldea. É de xustiza levantar acta do significado e influencia no noso modo de ser do que a cultura aldeá do noso mundo rural nos ten aportado a tódolos galegos. Unha forma de ser, nin mellor nin pero ca outras, senón, diferente e específica e que se expresa na configuración da nosa psicoloxía social e persoal. Por esta fina sensibilidade e traballo a nosa más afervoada noraboa ao noso entrañable amigo David.

Como podemos ver, este libro enxértase no traballo pola recuperación do máis xenuíno da cultura popular de Galicia na súa realidade rural do interior da nosa terra. A palabra “cultura” deriva do verbo latino “*colere*”, que significa cultivar. Unha forma deste verbo é “*cultum*”, que en latín significa agricultura. O adxectivo latino “*cultus*” refírese á propiedade que ten un campo de estar cultivado. Orixinariamente pois, “cultura” quería dicir “agricultura”, “culto” e “cultivado”. Co tempo empezouse a comparar o espírito dunha persoa ruda cun campo sen cultivar, e a súa educación co cultivo deste campo.

Esta metáfora deu pé a falar do cultivo da alma, ou cultivo das aptitudes propias do ser humano. Neste sentido falar dun ser “cultivado”